

四庫全書

史部

欽定四庫全書

平定準噶爾方略正編卷十五

乾隆二十年夏六月庚午

定北將軍班第等密奏阿睦爾撒納悖逆情形
班第等奏言臣等與阿睦爾撒納將撤兵事宜
商酌已定伊遣宰桑們都告稱據多果魯特鄂
拓克嗎穆特前來密告途中聞沙克都爾曼濟
鄂勒錐訥默庫與衆喇嘛等商議欲往迎達瓦

齊乘隙騷動雖沙克都爾曼濟等已隨扎拉豐
阿等起身然行程未遠或乘夜來襲亦未可定
應嚴加防備等語臣等即傳瑪木特詢問語甚
支吾詳察情形顯係阻撓撤兵之計臣等諭之
云達瓦齊在伊犁時沙克都爾曼濟尚不能為
力今豈更能往迎即迎之亦何能為惟是行軍
防範理固應爾雖無此信原不宜怠忽伊知臣
等不為所動復令自哈薩克逃回之達哈泰前

來密告哈薩克約有兵五萬前來之信臣等詳
詢達哈泰據稱我去年為哈薩克擄去今年四
月三十日逃回聞知哈薩克聚兵搶掠準噶爾
前隊兵於五月初旬起程後隊尚未齊集并聞
哈薩克人云達瓦齊與我等積成仇隙斷不令
其統轄準噶爾若阿睦爾撒納代為台吉我等
不敢發兵兩相和好臣等復以現在阿睦爾撒
納同大兵前來哈薩克等曾否聞知阿睦爾撒

納從前所遣丹津爾於何處遇見並巴特瑪車
凌額林沁現在何處是否同哈薩克兵前來一
一詢問據稱我並未遇見丹津巴特瑪車凌額
林沁聞其亦與哈薩克兵一同前來阿睦爾撒
納領兵到此哈薩克尚未及知如果聞知伊等
甚畏阿睦爾撒納自必退回不敢拒敵等語臣
等隨向達哈泰云爾即往哈薩克將阿睦爾撒
納現奉

大皇帝諭旨領兵前來平定準噶爾之處一一告知
哈薩克伊並不敢前往而阿睦爾撒納即以及
俟丹津回時自得實信為詞又捏稱達瓦齊於
八月內即來伊犁種種捏飾惟冀留駐大兵張
伊聲勢占據伊犁致悞入

觀日期臣等正言力阻雖不稍為搖惑但逆謀現已
顯著又阿睦爾撒納遣納噶查宰桑錫哈瑪私
給喇嘛熬茶銀一千兩且云我若統轄準噶爾

時必將爾等善為養育後經宰桑阿雅勒鵠告
知薩喇爾喇嘛人等皆言擾亂準噶爾全部係
達瓦齊阿睦爾撒納二人今大兵一到達瓦齊
不知逃竄何所我等方慶更生而阿睦爾撒納
復散布統轄準噶爾之言我等與其為阿睦爾
撒納暴虐不若急圖遠避等語再達瓦齊逃遁
後所有投降宰桑衮布達瓦薩爾坦雖曾助達
瓦齊為虐但既經歸附理應遵

旨解京乃阿睦爾撒納不行具奏亦不向臣等會商
擅自殺戮並將家產抄沒又欲襲殺達瓦齊屬
下宰桑車凌多爾濟摩羅及恩克博羅特吞圖
布等經臣班第鄂容安力阻而止已潛遣人將
伊等家產抄沒其尤甚者先經定議將準噶爾
錯處之衆分為四衛喇特汗編隸旗分佐領令
各居本地不得移居一處阿睦爾撒納又潛行
詭計將屬下被擄及向伊順從人等俱行收集

并各處遣人往來招致並不遵用

皇上頒給印信但用噶爾丹策零小紅圖記查準噶爾噶
爾丹策零為總台吉時悉用小紅圖記其下台吉人
衆如有私用者罪即應斬部衆莫不稔知今阿睦爾
撒納行文竊倣噶爾丹策零其心跡顯然可見仰懇
聖明降旨速將阿睦爾撒納調取回京所有四部落
即行分封絕其妄念奏入

上諭軍機大臣曰班第薩喇爾鄂容安密奏阿睦爾

撒納圖據準噶爾僭越妄行情跡顯著前班第等
初奏時朕尚以為防微杜漸之意傳諭公同體察
如阿睦爾撒納果有實跡明白具奏嗣復降旨阿
睦爾撒納受恩至重未必即萌悖叛之心使伊罪
未彰而治之以法朕心不忍且使新降之人俱生
疑懼是以未即傳旨令伊等辦理今據班第等詳
細奏聞阿睦爾撒納種種不法圖據準噶爾已無
可疑豈必待其生變始為實據由此觀之伊未必

即遵旨前來入覲即使前來若令仍往準噶爾斷
不能安分靜守必至妄行滋事與其俟伊交結煽
惑變遲而力費何如及今乘機辦理之為得也朕
意已決此事即宜速行辦理將此密諭班第等如
阿睦爾撒納尚未起程班第等即行密商或托以
商議事務密行擒治數其罪惡即於軍前正法齊
木庫爾納噶查與伊任用宰桑等一併俱行拏解
來京無干人等慰諭釋放候旨遵行事關緊要務

期熟籌妥辦俾一舉即得寧謐辦理後班第等即傳諭準噶爾部衆阿睦爾撒納自歸附以來受朕深恩委任信用伊並不遵奉訓諭滋擾投誠人等劫掠牲畜誣讎沙克都爾曼濟叛逆擅殺宰桑等大員抄沒家產其意將令準噶爾人衆盡行騷動然後獨踞準噶爾等衆台吉宰桑無不為伊屬下前因達瓦齊凌虐爾等部衆朕始定計進兵安轄地方撫綏衆庶今若縱阿睦爾撒納所為是貽

害爾等必更甚於達瓦齊是以將阿睦爾撒納正
法祇將附和數人治罪至爾等與伊所屬之人俱
無干涉照舊安居此正為爾衆人永久安全之計
將此通行曉諭如阿睦爾撒納已起身前來俟伊
到時朕當另行辦理如伊勉強前進及至中途或
於路通哈薩克處逗遛不前或寄信於巴特瑪車
凌等勾結生釁則應如何先事豫防之處著班第
等悉心籌酌一面辦理一面奏聞倘阿睦爾撒納

經伊游牧處托故遷延朕另遣人辦理但辦理阿睦爾撒納後伊游牧處必致驚潰或往哈薩克逃竄此亦當豫為防範朕已降旨以防守烏里雅蘇台軍營為名留兵一千名令普慶達色帶領駐防前降旨令阿蘭泰在烏里雅蘇台駐劄辦事其阿睦爾撒納游牧即著阿蘭泰普慶達色領兵前往與納穆扎爾辦理班第等將如何辦理之處一經酌定即速行知阿蘭泰令同普慶達色領兵往游

牧處將伊妻子及扎木叅并素日任用之和通等
一併拏解來京餘衆俱屬無干亦將此遍行明白
宣諭以安衆心至牧場馬駝應即盡行收取使伊
等不得乘騎逃遁如阿蘭泰尚未起程即將此等
情節詳悉告知若已起程則於辦理阿睦爾撒納
之際即作速密檄俾遵諭辦理倘阿睦爾撒納已
至熱河臨期朕另降旨與阿蘭泰等將伊游牧辦
理班第等務宜密之又密不得少有洩漏一切其

善體朕意計出萬全再辦理此事時雖不能不任
智術然仍當示以威信舉動得體方為妥協朕於
此屢念甚切此旨一到班第等即將如何籌辦之
處密速奏聞

壬申

密諭定北將軍班第等豫籌防禦巴特瑪車凌

上諭軍機大臣曰朕命班第等遣人曉諭哈薩克而
阿睦爾撒納必欲遣伊屬人前往即此可以想見

其心其中必潛通信息故令巴特瑪車凌留住哈薩克窺探此處情形若不令阿睦爾撒納統轄準噶爾地方則將藉巴特瑪車凌以為挾制之具今辦理阿睦爾撒納之意已決班第等接到前旨自當妥辦但事後哈薩克聞知巴特瑪車凌等勢必前來搆釁不可不留心豫備著班第薩喇爾鄂容安公同詳議嚴加防範

密諭烏里雅蘇台辦事大臣莫爾渾等豫籌防禦事

宜

上諭軍機大臣曰據班第等密奏阿睦爾撒納圖據
準噶爾種種悖逆不法情事已降旨令班第等將
阿睦爾撒納即在軍營正法但事後伊等游牧人
衆必致驚亂逃竄自應豫為防備是以於凱旋索
倫兵內留一千名派阿蘭泰普慶達色帶領俟班
第信到即往阿睦爾撒納游牧處擒其妻子及任
用宰桑等解送來京但思阿蘭泰等如未到烏里

雅蘇台辦理無人今特令阿桂前往先將所降班
第諭旨交莫爾渾舒赫德公同閱看俟班第信息
一到即遵照辦理班第等辦理阿睦爾撒納時或
有伊屬下人逃出至伊等游牧通信甚至搶掠喀
爾喀逃往哈薩克種種皆未可定莫爾渾等務為
加意籌辦如所留之兵已到而阿蘭泰未即前來
莫爾渾等即奮往辦理或阿蘭泰已經前來而兵
尚未到應否於喀爾喀各部落內調用之處即行

詳議密為豫備勿稍宣露納穆扎爾朕尚未降諭
旨爾等辦理時當密告納穆扎爾公同遵辦再莫
爾渾等所奏撤兵一摺內稱所到各隊兵丁統需
接濟口糧等語著於給發時略為延緩俾伊等多
留數日以備調遣

秋七月癸酉朔

議定凱旋兵丁口糧駝馬事宜

駐劄烏里雅蘇台辦事大臣莫爾渾等奏言各

處凱旋兵丁至烏里雅蘇台時按地方遠近應
各給與口糧如索倫巴爾虎黑龍江昭烏達等
處兵丁酌量給與口糧四十日察哈爾右衛綏
遠城及京城兵丁酌量給與口糧一個月喀爾
喀厄魯特兵丁無庸給與口糧其口糧於現貯
之炒米炒麵內動支若不敷用補給羊隻其自
西路凱旋之索倫巴爾虎察哈爾蒙古兵丁至
推河時亦應給與口糧所有索倫巴爾虎內扎

薩克兵丁酌量給與口糧四十日察哈爾兵丁酌量給與口糧一個月俱於達什和碩牧放羊隻內揀選二萬隻解赴推河分給各處兵丁所有原領口糧未滿日期者仍接算扣除至察哈爾兵丁及京師滿洲官兵前在烏里雅蘇台辦給馬匹駝隻無庸撤回即令騎馱至口上交納黑龍江兵丁亦將原辦給馬匹駝隻令其騎馱至本處交納昭烏達右衛綏遠城兵丁原有留

在烏里雅蘇台牧放馬匹駝隻倘不敷用再行
補給前往其由西路凱旋之索倫巴爾虎察哈
爾蒙古兵丁騎馱馬駝至推河時查明從前如
何辦給之處亦照此分別辦理奏入得

旨軍機大臣議奏尋議各處凱旋兵丁自應按照道
里遠近給與口糧莫爾渾等所奏俱屬可行惟
昭烏達與西路撤回之內扎薩克兵丁游牧較
近不必給與口糧四十日應給與口糧一個月

其各處撤回及補給馬駝數目仍分晰具奏所
有察哈爾及京師滿洲官兵騎馱馬駝至口上
時應交與總管達松阿輝色等接收牧放仍將
數目報明以備稽查奏入

上從之

丁丑

定北將軍班第等密奏阿睦爾撒納言語情形
班第等奏言臣等察看阿睦爾撒納甫至伊犁

即圖安居不願他往臣等詢其何日起程入

覲伊推託支吾但言此處事體尚未完竣哈薩克布魯特現有前來之信又云或奉

諭旨令其在此與臣等一同辦事亦未可定臣等據理開導雖勉強聽從而遲疑瞻顧之情時時流露數日內其辭又復變遷自云俟達瓦齊擒獲至尼楚滾地方視凱旋兵丁起程訖我即前往入

觀其意更屬可疑臣等暫為安慰不甚催促伊賦性狡詐恐臨期又復託故留頓或於半途稱疾俱未可定喀爾喀王額林沁多爾濟人尚老成有識見每當會議時能逆折其計阿睦爾撒納亦為敬讓臣等公同計議令額林沁多爾濟同伊一路行走又恐先啟其疑此時且不留形跡俟起程期近時告以奉

旨令額林沁多爾濟入

覲即可一同起程俟阿睦爾撒納抵熱河後

皇上訓諭開導伊背逆之意自必潛消奏入

上諭軍機大臣曰前班第等屢次密奏阿睦爾撒納

負恩狂悖斷難姑容是以特降諭旨令其密行擒

治今阿睦爾撒納復欲速來入覲語屬可疑未必

出於至誠特因所行非理懼班第等擒治因而多

方逞其狡獪是其言雖可聽實無欲來之心或行

至中途託病遷延或至塔爾巴噶台游牧依戀久

居均未可定夫以阿睦爾撒納如此奸宄狂悖豈
僅為降旨開導所能了事若不將伊擒治又何如
置之不問今伊惡迹已顯著如此班第等不思密
為辦理但稱請朕面加訓諭以折其心是全不知
事理之輕重矣著速行密諭班第如此際奉到前
月二十八日所降之旨已將阿睦爾撒納擒治甚
善若未及辦理而伊已起程前來班第等接到此
旨約計阿睦爾撒納行程未遠即遣人將伊追回

擒治如已逾旬日之外亦須沿途詳密偵探消息
再行辦理朕意阿睦爾撒納至塔爾巴噶台必詭
言防範哈薩克遷延不行班第等應即以會同防
範哈薩克為辭著薩喇爾鄂容安帶領所留兵五
百名及達什達瓦屬下兵聲言會合速行趕赴擒
治設伊行至中途託病逗遛伏竄他處不便遣兵
擒拏亦著班第等酌量設法妥辦總之阿睦爾撒
納逆跡已著不可姑容以致貽患將來然路途遼

遠班第等須盡心籌畫乘時決斷毋得稍自委靡
致失機宜再額林沁多爾濟不過一小有才之人
未經更事一切密要之語且勿令與聞將此一併
傳諭班第等知之

臣等謹案阿睦爾撒納覬覦不遂逆跡滋彰
我

皇上哲炳幾先知其必不敢入

覬是以屢奉

密諭令將軍大臣等即速擒治乃將軍大臣等因循
觀望既昧操刀必割之義及其託詞起程遷
延不進復荷

聖明照察

諄訓再三使稍識機宜者亦當慎遣威信素著之大
臣部勒同行尚可不致狡焉兔脫顧計不出
此而僅委其責於額林沁多爾濟一人故方
奏到之時

睿慮即以道里遼遠宜乘時決斷毋稍委靡剴切

申諭况額林沁多爾濟之為人將軍等方以為老成

有識而

聖訓洞燭早以小有才不更事為虞仰見我

皇上於萬里之外無弗前事立斷初不待阿逆還印

遠颺之日也則其不能稟承

謨畫在事諸臣猶得辭其咎哉

戊寅

定北將軍班第等疏奏都爾伯特台吉伯什阿
噶什等率衆來降

班第等奏言六月十五日都爾伯特台吉伯什
阿噶什和碩特台吉三濟特同至軍營告稱我
等游牧在哈薩克邊界大兵平定準噶爾今始
聞知是以率衆來降臣等查伯什阿噶什屬下
共三四千戶三濟特屬下共三百餘戶即行安
撫並令伊等隨同親王班珠爾等入

觀後據伯什阿噶什等告稱因游牧與哈薩克接壤
如無保護之人恐哈薩克乘間擄掠懇將伊弟
肯哲畢喀先來入

觀伊等回去保護游牧俟明年或後年游牧已定再
行入

觀臣等公同商議伯什阿噶什等原與達瓦齊離心
上年即欲歸降曾密語臣薩喇爾之兄布林今
因游牧離哈薩克甚近必須親往保護亦屬緊

要即照所請令伊等回保游牧飭伯什阿噶什
速遣伊弟肯折畢喀前來入

覲奏入報

聞

庚辰

議定準噶爾善後事宜

定北將軍班第等奏準噶爾善後事宜一摺得
旨軍機大臣議奏尋議據班第等奏稱準噶爾四衛

喇特奉

旨分封四汗其盟長應即令四汗兼管所有四部落
戶口數目各令本部部落編次旗分佐領其作為
公中之鄂拓克宰桑等戶口數目應按籍編次
補放官員頭目所有四部落游牧仍各安原處
毋庸遷移等語臣等查加封四衛喇特係按各
台吉等品級及戶口多寡

加恩封授至盟長乃辦理事務人員非世襲之職似

宜選授不必令四汗無攝應交班第等於四汗
及所屬大員內揀選開列職名請

旨補放餘應如所奏辦理又奏稱大兵所至回部頭
目次第來降俱安插於各本處地方惟葉爾羌
喀什噶爾等部相距遼遠比年來與準夷並無
交納之項其現在來降回部伯克美穆特等所
納貢賦照伊等舊冊辦理至如何酌減如何運
送內地及歸何項應用之處俟查明具奏再吐

魯番頭目之子滿蘇爾聞大兵一至即赴投誠其屬下人衆應否令其統轄其向住瓜州公額敏和卓情願遷移於吐魯番之魯克察克地方請派照管部員及安西武弁一員同往俟遷移後撤回等語臣等查回部居止遠近不同貢賦亦異應令班第等核對舊冊再行辦理其吐魯番部落原屬內地今舊頭目之子滿蘇爾既已歸誠其屬下人衆似應准其統轄但該部落現

係何人管轄并額敏和卓移於魯克察克是否相安且魯克察克與吐魯番頭目住處是否相連奏內亦未聲明應俟班第等將各項情節查明具奏後另行定議又奏稱汗哈屯巴斯庫斯等地方烏梁海現派青滾雜卜等前往收服俟收服後編次旗分佐領補放官職其得木齊收楞額等名色照舊存留俱如去歲辦理至從前收服之烏梁海移向原游牧吹等地方居住亦

交青滾雜卜等辦理再汗哈屯等處烏梁海俱
係用兵收服非自請歸降者可比將來無庸減
其貢賦等語俱應如所奏辦理但烏梁海賦性
愚昧所有新降人等貢賦獨不得邀

恩裁減未免易生猜疑應令青滾雜卜等明白曉示
以從前察達克等裁減貢賦因準夷未定即已
投誠與爾等俟大兵到時收服者不同若果實
心効順數年之後奏請

加恩一體裁減又奏稱扎哈沁人衆俱曾在阿爾台之布拉罕察罕托輝等地方居住今既將包沁人衆亦令瑪木特兼管應俱遷移於阿爾台等處俾喀爾喀與四衛喇特接壤之處多一藩籬再小策零敦多卜之子達什達瓦為喇嘛達爾扎所殺部衆分散今俱歸降隨大兵同討達瓦齊聞達什達瓦有子圖魯巴圖逃入回部如現在訪求可得或即令統其舊衆否則就部衆中

擇人心推服者領之俾移居於喀爾喀扎哈沁
包沁接壤之科卜多布延圖地方其餘現無頭
目台吉人衆俟查出另辦等語臣等查扎哈沁
包沁之人原與四衛喇特分居應如所奏遷移
其達什達瓦之子圖魯巴圖雖經尋訪而得與
不得及實係伊子與否均未可定且以全部之
人令一逃亡稚子統轄亦未允協請將達什達
瓦部衆及現無頭目台吉人衆俱慎擇人心推

服之宰桑統領令在布延圖居住至訪得圖魯
巴圖時請

加恩量授職銜給以百戶亦於科卜多布延圖地方
指給游牧居住又奏稱由伊犁至哈密及由巴
里坤至烏里雅蘇台軍營馳送事件現在俱設
有臺站其由烏梁海呈報駐劄伊犁大臣事件
即從相近卡倫接遞無庸另設臺站至由伊犁
至回部地方即照策妄阿喇布坦時沿途蒙古

供應之例亦無庸安設臺站等語俱應如所議
行又奏稱烏魯木齊魯克察克地方遼遠不便
攜帶家口無庸安駐內地兵丁今既議將瓜州
回衆遷移魯克察克地方即可派京城蒙古兵
二千名攜帶眷屬移往瓜州居住裁汰安西綠
旗兵丁等語臣等查從前伊犁駐劄大臣曾議
增兵以壯聲威經薩喇爾等奏稱準噶爾甫經
降服恐生疑懼并慮將來搶奪今班第等又稱

道遠難攜眷屬應無庸安駐內地兵丁近奉

諭旨於巴里坤留兵一千名駐防若瓜州回衆既遷
自宜酌派京兵往駐與巴里坤駐防兵丁更番
行走現因酌議西路安駐兵丁事宜令黃廷桂
來京俟到時臣等將瓜州巴里坤駐兵事宜公
同酌議具奏又奏稱喀爾喀與厄魯特舊為讐
敵若將喀爾喀游牧展至阿爾台與厄魯特游
牧相近不能無竊盜爭鬪之事即喀爾喀等亦

不願離故土逼處厄魯特游牧且喀爾喀等俱以牧養為業其鄂爾昆塔米爾推河等處若派滿洲兵丁攜眷屬前往屯戍一時不能嫻習日後恐開侵占之端應無庸派兵駐劄及安設臺站等語臣等查議令展拓游牧原為喀爾喀生計起見今班第等既稱與厄魯特逼處未便又恐鄂爾昆等處駐劄兵丁或至侵占喀爾喀游牧應如所奏無庸遷移駐劄又奏稱四衛喇特

金史卷之八十五
卷十五
等令各安舊業所屬賦稅仍給與伊等收管惟
噶爾丹策零舊時分內賦稅俱行交官現在派
員查辦等語臣等查四衛喇特荷蒙

皇上加恩分封自宜各安舊業其噶爾丹策零分內
所有賦稅原與伊等無涉應令班第等查明實
數如何收取支用另行酌議具奏奏入

上從之

辛巳

命定北將軍班第等詳察阿睦爾撒納情形

上諭軍機大臣曰據班第等奏稱聞哈薩克頭目諾顏阿布賚等私相商議阿睦爾撒納果領兵赴伊犁伊等即永相和好并將從前掠去輝特人等給還等語前據班第等奏阿睦爾撒納種種狂悖情事似應即行擒治續又稱阿睦爾撒納欲來熱河請將伊面加訓諭伊等前後所奏毫無主見即如所聞哈薩克頭目之言看來明係阿睦爾撒納詭

言哈薩克懼伊勢力煽惑衆聽顯有併據準噶爾之意若留伊在彼將來必滋生事端不若早為辦理但伊等所奏終屬含糊究未將伊實在情形明白陳奏著傳諭班第薩喇爾鄂容安伊等若接到前月二十八日諭旨將伊擒治則已如伊已經起程前來仍俟至熱河時另行定奪但阿睦爾撒納來時究宜如何辦理或可姑留與否若將伊訓飭後仍行遣回伊等能保其不致更生事端否著班

第等公同詳悉商議奏聞伊等奏到時朕再為酌定此旨著速行覆奏

命協辦陝甘總督劉統勲查勘巴里坤哈密地方移駐滿洲兵丁事宜

上諭軍機大臣曰前有旨令劉統勲於黃廷桂到任之後回京供職今黃廷桂川省任內現有應辦之事不能即赴陝甘而甘省政務邊防一切關係緊要如現議改駐滿兵處所尤當相度情形通盤籌

畫劉統勲即應親身前往會同策楞查勘并與班第咨商至將來瓜州回民仍回吐魯番原住牧處於該協督所請改設滿兵之外另設駐防滿洲兵二千名則哈密城堡等處或即於瓜州滿兵內分撥防守其綠旗官兵又可酌量裁減至貿易處如何派兵照料該協督均當親履其地悉心酌議具奏劉統勲係軍機大臣此等事宜伊即回京亦分所應辦將此傳諭該協督令其詳悉熟籌務期允

協

乙酉

命定北將軍班第等擒治阿睦爾撒納

上諭軍機大臣曰據班第等密奏阿睦爾撒納將所
賞黃帶孔雀翎置而不用並不將已經內附受恩
之處告知厄魯特人衆等語阿睦爾撒納種種悖
逆斷不可留朕屢經降旨密諭班第等遵辦今覽
班第等所奏阿睦爾撒納不惟不知感激朕恩且

將內附受恩之處欺瞞厄魯特人衆即此一節應
即明正典刑其餘悖逆之事更無足問矣班第等
如奉到前月二十八日所降諭旨已將阿睦爾撒
納擒治甚屬妥協如尚未辦理伊起程前來朕必
將伊拏問班第等諸事務宜密之又密不得稍有
洩漏

定北將軍班第等疏奏俘解達瓦齊起程日期
班第等奏言前經回人伯克霍集斯報稱擒獲

達瓦齊臣等派副都統額爾登額等帶兵前往
接應於六月二十四日額爾登額等與伯克霍
集斯將達瓦齊父子押解到營臣等查解送達
瓦齊赴京取道伊犁經行伊等游牧須派兵嚴
密防範現在於撤回兵丁內選派五百名令公
哈達哈率領厄魯特台吉根敦扎卜喀爾喀貝
勒那木扎爾車蘇隆等一同押解於本月二十
五日遣令起程其宰桑愛爾齊等七人與隨從

七十餘人俱在後陸續解到俟到日臣等詳訊
應解送者派員管押解京奏入報

聞

丁亥

定北將軍班第等密奏阿睦爾撒納言語情形
班第等奏言和碩特親王班珠爾追擒達瓦齊
回營應即赴京入

覲阿睦爾撒納捏稱布魯特葉爾羌喀什噶爾有合

兵來犯之信特穆爾淖爾游牧人衆現在畏懼
向內遷移令貝勒齊木庫爾車布登扎布告知
臣等欲於親王班珠爾貝勒齊木庫爾剛多爾
濟台吉唐古特宰桑阿巴噶斯察哈什特克爾
得克等數人內指派令其統兵防守游牧邊界
臣等告以班珠爾齊木庫爾俱係派定入
覲之人察哈什亦應奉

旨入

覲除此三人外方可選派阿睦爾撒納云此外無可
選派之人即便遣往亦不能辦事班珠爾又告
稱若將我舊屬賞還情願前往等語臣等詰以
從前因防範哈薩克布魯特調兵九千名分駐
兩處豈尚不足防守邊界則云所派之兵因統
領不得其人至今尚未全往臣等復詰以此時
應行入

覲之大台吉宰桑既可派留辦事照看游牧從前因

何不先派往又云彼時因尚無確信是以僅將
得木齊收楞額等遣派又向臣薩喇爾商議欲
令齊木庫爾料理兵丁起程後再行入

覲臣薩喇爾告之云此時即刻啟行尚恐稽遲若出
兵後焉能星速馳赴臣薩喇爾隨派諾海奇齊
克與宰桑特克爾得克一同前往且語以布魯
特邊界不過宵小盜竊爭奪斷無大事阿睦爾
撤納欲留班珠爾等之議始行中止至起身之

期猶再三延緩至二十九日始行又班珠爾屬人原自無多特倚藉阿睦爾撒納勢力將噶爾丹時收獲之鄂齊爾圖及車臣汗等和碩特屬人收取甚多臣等遵

旨止將伊等舊日屬人辦給餘俱屢次駁回奏入上諭軍機大臣曰據班第等密奏阿睦爾撒納阻止班珠爾等前來入覲又班珠爾倚藉勢力將並非伊舊日屬人歸併管轄經班第等駁回等語阿睦

爾撒納種種悖逆深負朕恩屢降諭旨令班第等
遵辦今閱此奏阿睦爾撒納欲留班珠爾齊木庫
爾等在彼不令前來入覲明係欲留其黨以增羽
翼其叛跡愈著班第等如遵照前月二十八日所
降諭旨已行擒治固屬甚善若伊已起程至塔爾
巴噶台游牧地方借防禦哈薩克之名逗遛不前
亦遵前旨著薩喇爾鄂容安帶領兵丁以會同防
範為辭將伊擒治倘阿睦爾撒納尚未至伊游牧

中途遷延班第等即以奉旨會商事件追伊回至
軍營辦理如不遵旨前來即著班第等帶兵追擒
先將通哈薩克路徑派兵堵禦使其不至免脫方
為妥協再前經降旨令伊等辦理阿睦爾撒納時
將齊木庫爾納噶查等一併查拏今查班珠爾亦
係其黨伊二人乃同母異父之子自必同謀班珠
爾亦應一併治罪但伊已於二十九日隨同阿蘭
泰來京途中尚可稍緩俟伊至熱河另行辦理班

第等此次力折阿睦爾撒納阻止班珠爾之議薩喇爾即將諾海奇齊克等派出防禦不令阿睦爾撒納得逞奸謀甚屬可嘉班第薩喇爾鄂容安務宜加意奮勉和衷集事庶不負朕委任至意

戊子

議定巴里坤駐劄京兵口糧事宜

協辦陝甘總督劉統勲奏言哈密原貯糧米三萬四千五百餘石此次用兵運往米麵約存六

萬九千七百餘石又餘存牛羊肉乾十九萬餘
斤現為支給防兵口糧之用將來凱旋官兵沿
途口食雖未定實存確數但駐防巴里坤京兵
共一千名計算每年口糧約需五千石前項口
糧實屬充裕無庸另為籌畫再此項糧石存貯
哈密舊設糧員管理今巴里坤駐劄京兵若將
口糧運存彼處勢須委員料理查兵丁每季所
需有限若將本營牧放駝隻按季赴哈密關領

更為省便奏入得

旨軍機大臣議奏尋議現今西路凱旋京兵議於巴里坤駐劄所需口糧奉

旨諭劉統勲令其酌量籌畫今哈密積貯既多而巴里坤兵丁需用無幾自可無庸運貯糧石設員管理祇令京兵按季赴哈密開領較為省便應如所議辦理至瓜州與哈密相去不遠現議瓜州駐防滿洲兵二千名原令屯田供食或將來

駐兵之初所入不敷支食即於哈密存貯餘糧
內撥往接濟應一併籌辦統俟該協督劉統勲
親往巴里坤一帶會同策楞查勘情形定議撥
兵駐防後再行妥擬具奏奏入

上從之

命授吞圖布恩克博羅特為頭等侍衛

先是定北將軍班第等奏言六月初四日據厄
魯特貝勒扎木叅之宰桑達沙在闐勒奇嶺拏

獲達瓦齊宰桑恩克博羅特十六日官兵追擒
達瓦齊時拏獲宰桑吞圖布二人俱係達瓦齊
信用之人應解送京師隨派侍衛默德庫等押
解前來至是抵京奉

旨吞圖布恩克博羅特俱著授為頭等侍衛並各賞
銀一百兩遣赴熱河等候

平定準噶爾方略正編卷十五

欽定四庫全書

史部

平定準噶爾方略正編卷十八

六至

詳校官監察御史

臣孫家賢

通政使司副使

臣莫瞻菴覆勘

總校官進士

臣

朱鈐

校對官編修

臣

周厚轅

謄錄監生

臣

汪瀾

欽定四庫全書

平定準噶爾方略正編卷十六

乾隆二十年秋七月癸巳

密諭定北將軍班第等

上諭軍機大臣曰班第等奏阿睦爾撒納種種狡詐
屢次虛張哈薩克布魯特之信或云兵來或云欲
與伊和好語言不定等語看來阿睦爾撒納妄思
蠢動逆跡顯著朕已屢降諭旨班第等自必遵辦

至伊屬下人等應如何歸入公中分管之處此時亦宜密為籌畫再班第等遣員解送達瓦齊宰桑愛爾齊等及與巴朗同逃台吉內齊額布根等九人俱應行審訊其餘並非要犯不必盡行解京惟此內有因病留於回部之吹索諾木額木齊俟病痊即行解京又從前班第等奏稱喇嘛呼必爾罕曾言阿睦爾撒納有統領準部之分今尚藏匿阿睦爾撒納處等語似此斷不可容留致使煽惑生

事班第等即查出派員解送來京毋得任其脫逃
又

諭曰班第等奏據阿睦爾撒納告稱宰桑拉蘇隆係
達瓦齊之黨該鄂拓克人等俱不信服乞將舊宰
桑之子布庫補放宰桑拉蘇隆給與職銜令其効
力應請旨遵行等語布庫如果係舊宰桑之子令
其補放事尚可行但伊等從前曾奏阿睦爾撒納
依勢作威凡與伊有隙者有心阻抑其附和承順

十六
之人即與交好今所奏拉蘇隆布庫等一節係班
第等照伊所請入奏而阿睦爾撒納反不置一辭
或拉蘇隆與伊有隙又或布庫暗中交結皆未可
定班第等恐為其所愚著傳諭密詢班第等如無
前項情弊俟奏到再降諭旨又

諭曰班第等密奏達瓦齊牲隻什物阿睦爾撒納薩
喇爾皆私自掠取彼此不相和協等語班第等以
此事陳奏全未知朕用人之意阿睦爾撒納薩喇

爾皆係厄魯特貪饕性成若使阿睦爾撒納無悖
逆之跡不過貪取財物原可無庸深究至薩喇爾
更係厄魯特屬人歸順已久受恩甚厚諒使必不
至有僭妄狂悖之事若因此等小事疑而不用何
以收羣策之力即以掠取牲隻什物而論朕知薩
喇爾必不至如阿睦爾撒納之甚現在班第鄂容
安會同薩喇爾辦理緊要事務若過於疑心使伊
知覺轉屬無益班第等惟當開誠相示據理阻止

薩喇爾自必聽從若亦如阿睦爾撒納之多方防
範使伊畏懼或致激成事端關係匪細況薩喇爾
不過暫住伊犁一二年並非令其長久任事之人
此時無庸過於苛求班第等務宜善體朕意公同
籌畫以副朕委任

臣等謹案薩喇爾歸誠最先受

恩最重我

皇上念其熟悉彼地情形遇事奮勉因令宣力戎行

以資策勵仰見

聖主隨材集事之至意若其乖便掠取牲隻一節原屬厄魯特陋習將軍大臣等禁防太過適足啟其猜疑於軍務無益有損且其人即繩檢不周斷不至如阿睦爾撒納妄冀總台吉之比

天語所頒實已揭其底裏且自古軍事權宜取濟不廢使貪使詐固與平居斤斤崇尚簠簋廉隅

者不同伏讀

聖諭曰開誠阻止曰無事苛求不惟用人之

大度非諸臣所能窺測而

至誠愷惻足以感孚異類兼收羣力

睿謨碩畫尤為深切著明矣

甲午

諭止定北將軍班第等搜查準噶爾人等藏匿牲畜

什物

上諭軍機大臣曰班第等奏準噶爾內亂之餘時被
哈薩克侵掠所有牲隻什物各游牧互行掠奪藏
匿者多現在徹底清查等語準噶爾甫經平定辦
理諸事俱宜寬大以慰衆心此際未經查出者可
即停止惟阿睦爾撒納貪饕恣取不得任其隱匿
俟將伊擒治後班第即於伊游牧嚴行搜查若阿
睦爾撒納已起程前來候朕旨到日再行辦理

丁酉

定議準噶爾投誠各鄂拓克宰桑等授官分職
事宜

定北將軍班第等奏言準噶爾各鄂拓克宰桑
等陸續來降前奉

諭旨令臣等將鄂拓克宰桑世襲之處定議請

旨其達瓦齊所屬人等應歸入公中管轄臣等查各
處台吉俱量戶口多寡給與職銜應准其世襲
其達瓦齊所屬宰桑得木齊等應請照扎哈沁

包沁例作為公中屬下將為首宰桑授以三品
總管果能奮勉無過准令伊子承襲如辦理不
善即另選賢員補授此內有

恩賞散秩大臣副都統等職銜者照瑪木特例仍兼
總管之任戶口三千戶以上授為內大臣一千
戶以上授為散秩大臣一千戶以下授為三品
總管一百戶以上授為四品總管計戶口至一
千戶以上授副總管一員至二三千戶者授副

總管二員每一百戶編一佐領各選授佐領一員仍留得木齊收楞額舊名謹將各宰桑應授職銜分別請

旨再伊等進

貢之例現在稽查原冊酌議裁減其供贍喇嘛之沙畢納爾鄂拓克請仍照舊例辦理奏入得

旨軍機大臣議奏尋議班第等開列率領戶口來降宰桑共五十二人內綽和爾宰桑約蘇圖等前

奉

恩旨俱授為散秩大臣至班第等業經議奏應授內
大臣之喀喇沁宰桑鄂勒錐應授散秩大臣之
克勒特宰桑巴桑等應授三品總管之庫圖齊
訥爾宰桑鄂勒錐等共三十二員並已奉

旨俞允其未給職銜之二十人內惟烏爾古勒濟爾
係準噶爾舊宰桑現在遵

旨派令入

覲恭候

欽定職銜其烏喇特宰桑厄爾錐音應授為內大臣
巴爾達穆特宰桑扎爾齊木特楞古特宰桑卓
特巴吞圖布等三人俱應授為散秩大臣烏魯
特宰桑和爾和岱錫克錫爾格托克托博羅特
烏爾罕濟蘭宰桑袞楚克扎卜阿都沁宰桑敦
多克等五人俱應授為三品總管烏魯特宰桑
杭吉勒圖烏克爾沁宰桑頗爾布等二人俱應

授為四品總管又宰桑俄羅斯殺舊宰桑奇塔
特率其四千餘戶來降應授為內大臣但所率
非其屬下應授為散秩大臣並交班第等酌量
或令俄羅斯管理該鄂拓克或應另選賢員管
理之處詳議具奏其宰桑巴蘇泰糾合庫圖齊
納爾之得木齊博托什率九百餘戶來降亦應
授為三品總管並交班第等查明博托什現在
何處及應否給與職銜之處另行定議再朔包

沁之得木齊賽音察克率一百五十餘戶來降
奉

旨授為副總管現在定議一百戶以上者俱授為四
品總管其賽音察克職銜仍候

欽定拉布林集賽得木齊朋楚克綽倫巴圖吹扎木
素多爾濟俱應授為四品總管所有賞給內大
臣散秩大臣等職銜人員俱照瑪木特例仍令
兼總管之任將來或令承襲或另選賢員俟酌

量人才分別辦理其分別設立副總管並編設
佐領各事宜俱應如班第等所奏辦理至伊等
每歲進

貢之例即令班第等查明舊冊酌量裁減其供贍
喇嘛之沙畢納爾應仍照舊例辦理奏入得

旨所有準噶爾舊有之四圖什墨勒厄爾錐音約蘇
圖阿巴噶斯俱著授為內大臣其袞布所遺之缺
俟選人補授亦著授為內大臣賽音察克仍授為

副總管餘依議

己亥

定北將軍班第等疏報分隊撤兵事宜

班第等奏言臣等前奏帶兵至尼楚滾地方留駐劄兵丁五百名其各處兵丁俱令陸續撤回今於七月初七日已至尼楚滾地方將察哈爾喀爾喀兵五百名留駐其撤回兵丁按隊編次北路喀爾喀兵五百名扎哈沁兵三百名索倫

兵三百名為第一隊令王桑寨多爾濟貝子沙克都爾扎卜公策登薩木丕勒等帶領於十一日起程察哈爾兵二千餘名為第二隊令副都統栢起侍衛薩木都卜等帶領將臣阿睦爾撒納兵一千五百餘名隨後撤回西路都爾伯特兵二千名為第一隊令王策凌孟克等帶領於初十日起程察哈爾兵八百餘名喀爾喀和托輝特兵三百餘名為第二隊令貝勒品級車木

楚克扎布公旺布多爾濟總管巴祿等帶領寧
夏涼州莊浪滿洲兵及綠旗阿拉善瓜州哈密
回兵等一千餘名令將軍和起等帶領陸續撤
回最後索倫兵一千七百餘名令副都統額爾
登額總管畢里袞等帶領其三格帶領之索倫
兵一千名飭營總等帶領撤回各處兵丁從前
給與口糧已踰日期現將尼楚滾牧放羊隻酌
量給與俟至塔爾瑪善屯田地方所種糧石計

已收獲令每人支給一斗以資接濟臣阿睦爾
撒納遣回扎卜堪游牧兵七百餘名亦一例支
給其安置塔爾巴噶台游牧兵八百名既有此
處羊隻可以接濟無庸給與口糧各隊撤回兵
丁俟過烏蘭呼濟爾察罕呼濟爾等處即將喀
爾喀聲援兵三千名亦給與口糧羊隻令副都
統扎爾杭阿王巴扎爾什第公達爾扎巴圖孟
克齊旺多爾濟等帶領撤回其塔爾瑪善處計

可得糧二千石支給撤回兵丁約需七八百石
尚餘千餘石請給臣阿睦爾撒納游牧人等作
為口糧並將屯田兵丁令塔爾瑪善成衮扎布
等陸續撤回奏入報

聞

庚子

命解布魯古特台吉尼瑪來京

先是定邊右副將軍薩喇爾奏言西路進兵時

達瓦齊遣布魯古特台吉尼瑪前往額林哈畢
爾噶地方探取噶爾藏多爾濟信息經官兵拏
獲解赴定西將軍永常營內拘禁至是傳

旨劉統勲遴委幹弁押解尼瑪來京

辛丑

密諭定北將軍班第等

上諭軍機大臣曰班第等密奏阿睦爾撒納種種逆
跡圖據準噶爾地方及促令起行後次日即行住

宿復遣納噶查告稱阿巴噶斯約蘇圖烏克圖與喇嘛等潛行計議如不令阿睦爾撒納統領駐劄伊等寧剖腹而死不能貪生別事他人等語阿睦爾撒納叛跡已彰辦理自不容猶豫昨據奏阿睦爾撒納已於初十日起行朕意方謂就此辦理甚屬便易但據班第今日所奏則似阿睦爾撒納意中已不無猜疑朕心深為廕念乃班第等奏稱或俟伊至熱河時酌量辦理或令於熱河附近及呼

倫貝爾等處居住所言參差不定是全不知事理之輕重矣試思現在事勢至此朕即有姑留阿睦爾撒納之意伊等俱係目悉情形理當據實陳奏無所遲迴而乃二三其說不能果斷若此朕甚不取再如阿睦爾撒納故令納噶查來述阿巴噶斯等之言彼時如何相答亦未奏及又稱將約蘇圖等業行調取等語夫阿睦爾撒納遣回納噶查逞其誕妄之詞明係試探伊等使識見明敏之人即

當向納噶查云阿睦爾撒納與我等同為將軍伊之前去即如我等前去我等在此亦即如伊在此宰桑等何敢作此妄語果其有之即應向阿睦爾撒納查問如此詰責不但當下情詞可以洞悉即伊回告阿睦爾撒納時亦可疑慰其心今既不出此恐阿睦爾撒納不能不生疑畏再達什達瓦之妻告稱阿睦爾撒納欲娶其女協力相助即可收服四衛喇特之語似覺荒唐以阿睦爾撒納之人

之行此言在所必有但今日安肯輕吐使薩喇爾聞之能保其不為傳述乎伊即有此言班第等惟應密加防範而仍示以不疑乃告以將此情節具奏殊非慎密之道今此事既往無庸置議此間相距甚遠一切事宜班第等務宜相機籌辦勿致稍有貽悞再觀阿睦爾撒納欲前復却情形其意詎肯徑行前來班第等此時如遵朕前旨將伊業已擒治固甚妥協如未及辦理而伊已起程前來勢

必在塔爾巴噶台游牧處逗留班第等加意探訪
一得信息即遵朕屢次所降諭旨務期熟籌妥辦
一舉萬全無少疎漏慎之

申諭定北將軍班第等擒治齊木庫爾事宜

上諭軍機大臣曰昨傳諭班第等辦理阿睦爾撒納
後即將齊木庫爾等一併擒治今思阿睦爾撒納
受恩深重奸狡狂悖實為罪魁齊木庫爾等尚與
納噶查之附和生事者有間若一併辦理恐準噶

爾各部妄起猜疑且以擒治一二人而發兵動衆
亦覺非體著傳諭班第等將來擒治齊木庫爾等
不必帶兵但令其前至軍營解送來京若抗拒逃
遁再發兵聲罪致討其分散游牧人衆及清查牧
場各事宜仍遵前旨行

臣等謹案阿睦爾撒納肆逆潛逃如納噶查
等之甘心同惡構煽相尋其罪自不可遁至
脅從之衆株連過甚無論玉石俱焚且適阻

其自新之路況阿逆蹤跡始露即妻子兄弟亦知其負

恩逆理不能倖免

皇上洞悉其衆叛親離必生攜貳雖與逆同氣如齊

木庫爾且

特降諭旨暫停擒治即附逆之阿巴噶斯等尚令將軍大臣詳察或係實心黨惡或係勉強服從分別辦理蓋由

聖主德威遐邇所以馭逃聽之衆者事事義盡仁至
彰瘴咸宜自能感發其去逆效順之天良也
觀於齊木庫爾於阿逆未竄之前已將欲叛
情形告之額林沁多爾濟愈以見我

皇上知人服物之神無遠弗屆視史策所稱尤有超
出隆古萬萬者矣

八月壬寅朔

副都統普慶達色疏奏帶領兵丁駐劄烏里雅

蘇台日期

普慶達色奏言臣普慶帶領第一隊京兵至錫爾古勒圖地方於六月十二日准將軍班第等撤兵文移即遵照撤回嗣於七月初九日接奉諭旨令臣普慶於京兵內帶領五百名臣達色於索倫兵內帶領五百名駐劄烏里雅蘇台聽候阿蘭泰調遣臣普慶遵

旨於京兵一千名內揀選五百名派章京五員管轄

於七月十九日已抵烏里雅蘇台餘兵五百名
交帶領第二隊兵丁之翼領存保等於二十四
日起程回京臣達色於十八日已抵烏里雅蘇
台將索倫兵揀選五百名駐劄聽候調遣所有
臣原帶黑龍江兵二千名編為四隊於二十四
五等日起程遣回奏入報

聞

癸卯

諭駐劄烏里雅蘇台辦事大臣莫爾渾等

上諭軍機大臣曰莫爾渾等奏請將撤回各隊兵丁
內留駐二千名馬三千匹於烏里雅蘇台備用等
語所奏殊屬畏葸從前降旨以看守烏里雅蘇台
軍營為名留兵一千今忽倍增其數倘阿睦爾撒
納覺悟猜疑將致別生事端若慮伊等游牧滋事
須以兵力彈壓則將來所擒治者不過阿睦爾撒
納黨羽數人其餘俱可撫慰安定何事張皇今計

阿睦爾撒納尚未至烏里雅蘇台著速傳諭莫爾
渾等仍遵前旨留兵一千名馬二千匹已足供調
遣之用此時阿蘭泰已應抵烏里雅蘇台諸事悉
心會同商酌妥協辦理務宜慎密不得稍露形迹

甲辰

密諭定北將軍班第等

上諭軍機大臣曰班第等奏稱阿睦爾撒納納噶查
阿巴噶斯察哈什等迴避衆人密商竟夜或煽動

各游牧使不遵約束或與綽和爾約蘇圖等結連
哈薩克布魯特侵擾邊境俱未可定等語阿睦爾
撒納之必應擒治自無可疑但看此情形伊詎肯
即來入覲勢必逗留於塔爾巴噶台游牧班第等
即遵前旨辦理至阿巴噶斯察哈什等跡似同謀
或但畏懼伊之總統準部或實係有心甘為黨惡
俱宜體察若同黨屬實即應一併辦理若勉強順
從而概加擒治準部諸酋見因一人而株連甚衆

人人疑懼亦有未便此等機宜班第薩喇爾鄂容
安宜詳悉籌酌相機辦理至回部霍集斯伯克已
降旨令其明年入覲所奏伊於解送瓦齊時陰
求阿睦爾撒納俟招降葉爾羌喀什噶爾後令其
總統各部心殊叵測此但因阿睦爾撒納現係將
軍且恐其總統準部耳尚無足深慮惟阿睦爾撒
納遷延留戀甚有關係班第等若即能辦理固善
或前來熱河須候朕旨再行再班第等前奏阿睦

爾撒納起程後納噶查前來試探述阿巴噶斯等
誕妄之語今伊等竟夜密商或即係此情節前經
班第等將伊等調取曾否前來摺內何以並未聲
明又阿睦爾撒納等屏人私議既為班第等偵探
而知而遣人偵探之時阿睦爾撒納又豈竟無知
覺此等事宜務須密之又密方無貽誤至阿睦爾
撒納所收達什達瓦等屬人及掠取別部人等擒
治伊等後即當分別辦理或給還本部或編次歸

公務宜逐一清查釐正又所奏巴里坤駐兵一節
著班第等將久在準噶爾之滿洲蒙古兵丁查明
數目令在巴里坤居住伊等言語風土既為熟習
若與瓜州安西兵丁更番輪替俾新調各兵漸次
學習將來即可挈家駐劄仍俟班第等奏到日交
軍機大臣會議以聞

已酉

申諭辦理阿睦爾撒納事宜

上諭軍機大臣曰班第等奏稱奉到六月二十八日諭旨時阿睦爾撒納業與額林沁多爾濟同行又有各處撤回兵丁在後阿睦爾撒納自必前來入覲等語阿睦爾撒納果來至熱河辦理自易且將伊罪惡令暴白於新來投誠人等亦可以快衆心而彰國法但伊甫經起程即有人指其罪狀紛紛告訐伊豈不聞風畏懼且伊自揣所為必不敢前來入覲雖已起程或沿途托故戀住游牧事所必

至伊現在已抵何處摺內未經奏明前曾諭及起程若尚在十日以內即行擒治此時曾否辦理所當加意慎密如尚未辦理現在雖有攻擊阿睦爾撒納之人且陽為解勸置之不問切勿令其知覺致生他變至阿巴噶斯誕妄情形顯與同惡今伊忽告薩喇爾云從前隨阿睦爾撒納行走未得在將軍前効力等語前經班第等調取阿巴噶斯等前來此時果遵調前來與否摺內亦未明晰又管

理伊犁渡口回目鄂斯滿伯克來訴阿睦爾撒納
強取其牲隻口糧俟辦伊游牧後酌量給還即不
敷抵補料擒治阿睦爾撒納後衆心已快亦可無
庸補給再所奏塔爾巴噶沁台吉額林沁由哈薩
克逃回現住博羅塔拉與阿睦爾撒納同族而有
宿嫌今雖攀援內附中心必不相合俟來見時加
意體察自可得哈薩克與巴特瑪車凌信息等語
班第等或令額林沁前來入覲或酌量安插原游

牧處公同酌定即行奏聞至薩喇爾於阿睦爾撒
納之姊來見時察其醉語甚屬留心但婦女言詞
不足深究即如阿巴噶斯等亦不過趨附勢力勉
強脅從之人若概行窮治則各部未免生疑但阿
睦爾撒納既有令伊姊子沙津巴圖管領達什達
瓦戶口協力同助之語將來或即將沙津巴圖安
插於察哈爾地方若沙津巴圖尚無異心亦不必
安插將此傳諭班第等俟辦理阿睦爾撒納後即

遵旨辦理

庚戌

定議辦理達什達瓦屬下戶口事宜

定邊右副將軍薩喇爾等奏言聞阿睦爾撒納
欲將達什達瓦所屬數千戶請給伊姊子沙津
巴圖管轄應請

旨將達什達瓦屬人作為公中管理併給與游牧地
方以絕其僥倖之心奏入得

旨軍機大臣議奏尋議現在遵

旨傳諭將軍班第等俟辦理阿睦爾撒納後將伊所
占達什達瓦屬下及各部落人等分別給還本
部或編次歸公今達什達瓦部衆分散有見大
兵前進陸續來投亦有伊等自行收集者應查
出極貧之戶較賞給阿睦爾撒納屬人口糧數
目酌減每人給與馬一匹羊二隻每二人合給
乳牛一隻其德勒格爾之子沙津巴圖特古斯

哈什哈之子布圖庫祇應給與伊等舊日屬人
所有達什達瓦車凌那木扎爾伯格里等屬人
作為公中管理至達什達瓦之孀婦酌量給與
戶口以資養贍此項人衆應於今年移往舊游
牧哈喇沙爾地方從庫車等回部支給口糧明
年令在博克達種地俟秋收後移往科卜多布
延圖居住又臣等奉

旨以達什達瓦之妻不與阿睦爾撒納結姻應賞給

封號以示獎勵請俟辦理阿睦爾撒納後再行
具奏請

旨奏入

上從之

辛亥

諭駐劄烏里雅蘇台辦事大臣莫爾琿等防範阿睦
爾撒納游牧地方事宜

上諭軍機大臣曰據納穆扎爾奏據阿睦爾撒納屬

人告稱現在烏蘭布木地方水草缺乏請將游牧移於扎卜堪河之銓格爾格固治地方以度秋冬現已准其所請等語納穆扎爾未知辦理阿睦爾撒納事宜准其遷移游牧今若復令回至原處徒多紛更亦有未便但現在解送恩克博羅特來京時阿睦爾撒納遣伊宰桑至其游牧其中必有詭計今忽請遷移游牧事甚可疑著將納穆扎爾奏摺抄寄莫爾渾等閱看宜事事留心防範此際若

已得阿睦爾撒納前赴游牧信息即速奏聞

壬子

命厄魯特頭等侍衛恩克博羅特吞圖布在

乾清門行走

甲寅

申諭辦理阿睦爾撒納事宜

上諭軍機大臣曰班第等奏都爾伯特台吉伯什阿
噶什告稱從前古爾班和卓聞大兵平定伊犁原

與哈薩克計議歸附續因阿睦爾撒納遣使到彼
哈薩克復有出兵信息請遣兵相助以為聲援班
第等遂派侍衛章武宰桑博第前鋒阿喇勒拜等
前往等語看此情形明係阿睦爾撒納陰相煽誘
即如阿巴噶斯等亦皆受其籠絡今但將阿睦爾
撒納擒治釁端即可永弭朕意阿睦爾撒納此時
必逗留於游牧地方班第等即遣人往追伊必不
遵行惟遵照前旨即令薩喇爾鄂容安領兵至塔

爾巴噶台將伊擒治方為妥協如伊果前來入覲
則俟伊到熱河時辦理固甚易也從前遣使至哈
薩克時阿睦爾撒納必令伊屬下人前往其中顯
有詭計曾降旨將伊所遣之人訊問班第等如業
將阿睦爾撒納擒治即嚴拏阿睦爾撒納遣往哈
薩克之人訊明切實供詞具奏再班第等曾奏訪
得阿睦爾撒納與阿巴噶斯等竟夜屏人密語而
納噶查傳說阿巴噶斯誕妄之言有若不令阿睦

爾撒納統率準噶爾伊等惟有剖腹而死等語乃
阿巴噶斯又向薩喇爾告稱有被阿睦爾撒納留
住不得在將軍前効力之語如班第等訪聞屬實
則伊等有心同謀罪在不赦如阿巴噶斯向薩喇
爾之言果係實情則是第為阿睦爾撒納威力脅
制情尚可原班第等應加意體察不可受其欺紿
亦不得過於疑慮且似阿巴噶斯之人亦必不一
而足若辦理阿睦爾撒納後一一根究則以一人

而株連衆人新降人衆必生疑懼於事無益班第
等務宜斟酌辦理今所慮者阿睦爾撒納或乘間
逃入哈薩克亦未可定如果逃往班第等即遵朕
前旨遣人曉諭哈薩克務必令其擒獻倘不遵行
則以兵力進取現在阿睦爾撒納行至何處及於
何處逗留摺內並未聲明著即速查明具奏至此
次投誠之台吉宰桑等朕俱酌量施恩賞給爵秩
伯什阿噶什將哈薩克情形詳悉告知其輸誠更

屬可嘉且係準部大台吉著加恩封為親王前鋒
阿喇勒拜亦屬奮勉著賞給藍翎伊等前往招服
古爾班和卓後即將情形奏聞

定北將軍班第等疏奏辦理霍勒博斯宰桑巴
雅爾拉虎事宜

班第等奏言霍勒博斯鄂拓克得木齊雙和爾
等告稱達瓦齊將我等宰桑吹納木喀之子巴
顏哈什哈殺戮用其黨巴雅爾拉虎為宰桑殘

虐不法造言煽惑請加懲治等語臣等查從前
準噶爾夷使吹納木喀之子巴顏哈什哈既為
達瓦齊所害巴雅爾拉虎繼為宰桑大兵到時
全部俱已輸誠伊未經前來投順又曾阻止伯
什阿噶什歸降今為伊得木齊等控告臣等飭
交侍衛章武等前往辦理令伊親身赴質若仍
遷延不至即著伯什阿噶什等擒送治罪仍于
吹納木喀子孫內令鄂拓克公舉一人補授宰

桑奏入報

聞

定北將軍班第等疏奏平定準噶爾續進各隊官兵自六月初十日至二十四日陸續撤回奏入報

聞

乙卯

定北將軍班第等疏奏哈薩克通使情形

班第等奏言臣等奉到七月初五日

諭旨令臣等追回阿睦爾撒納相機辦理臣等公同酌議阿睦爾撒納起程已十四日但聞伊在博羅塔拉等處逗留相去自不甚遠即遵

旨行文令其回至軍營是日據阿睦爾撒納遣往哈薩克之丹津與哈薩克來使阿穆爾巴圖魯同至告稱阿睦爾撒納起程已十三日伊等速回亦須至額米爾等處方可追及等語臣等詢問

哈薩克來使願與阿睦爾撒納同行且辭意極
為恭順今若將阿睦爾撒納倉卒調回伊必益
生疑忌且哈薩克來使未知始末見而驚懼逃
竄聲張均未可定似應不露形迹俾行近內地
時再為辦理因酌量賞給來使遣回阿睦爾撒
納處即星夜遣人追回送文之丹巴喇等復遣
人偵探阿睦爾撒納已至何處作何行止陸續
來報奏入

上諭軍機大臣曰班第等奏遵旨行令阿睦爾撒納
回至軍營適伊從前遣往哈薩克之丹津與來使
同至辭頗恭順未便遽將阿睦爾撒納調回致生
事端遂即停止追回等語所辦尚合機宜但哈薩
克來使阿穆爾巴圖魯既懇入覲班第等即應明
白曉諭以阿布賚誠心款附恭順可嘉我等即奏
聞大皇帝令爾等隨阿睦爾撒納一同入覲如此
伊等既知內地將軍權柄所在而阿睦爾撒納亦

難於阻止今將來使遣回聽阿睦爾撒納定議恐
伊未必遣令前來在阿睦爾撒納初不願哈薩克
來使恭請入覲而又難於禁止是以令往班第處
定議今班第仍交阿睦爾撒納辦理是則隨其術
中殊未允協嗣後哈薩克如再遣使前來即徑送
入京至阿睦爾撒納之兄普爾普宰桑烏巴什及
在逃之固穆扎卜等或隨伊入覲或留匿伊游牧
處俱應分別辦理惟葉克明安之德濟特察衮初

降時頗屬安靜後漸驕縱貪饕此特附和阿睦爾
撒納之人班第等宜詳察情形相機辦理又所奏
善披領集賽之尼爾巴喇嘛密告阿睦爾撒納使
伊等保留駐劄不願入覲伊等未經允從又告其
暗結各宰桑遣回游牧情事甚屬可嘉著即授為
大喇嘛明年令其前來入覲現在章武阿喇勒拜
等協同伯什阿噶什招撫哈薩克可即將哈薩克
現在遣使前來之處曉示伯什阿噶什等伊等抵

哈薩克邊境時毋得搶掠生釁惟加意防守即伊
部落有兵侵軼亦先以理諭令其撤回如不遵再
為擒勦仍將招撫哈薩克情形陸續奏聞

己未

命副都統鄂實帶領達瓦齊及伊子於張家口外居
住俟熟河回

鑒行獻俘禮所屬宰桑等即解京看守

庚申

申諭定北將軍班第等籌辦阿睦爾撒納同黨及游牧事宜

上諭軍機大臣曰朕前降諭旨俟辦理阿睦爾撒納後若將同黨之德濟特察滾阿巴噶斯察哈什等盡行擒治恐準噶爾各部妄生疑懼此中若有實係脅從非其本心者即不必辦理又如阿睦爾撒納之兄普爾普扎木叅齊木庫爾其俱應擒治與否班第等宜悉心體察據實奏聞再阿睦爾撒納

之塔爾巴噶台游牧人衆朕意與其分給衆人不
若令喀喇巴圖魯阿玉錫管領再擇一協同管領
之人在扎卜堪等處居住亦可仍傳示伊游牧以
阿睦爾撒納負恩悖逆斷不可留罪止其身與衆
無與特不忍伊等離散派出大員管理似此辦理
事後可不致別生事端與否班第鄂容安現在彼
處薩喇爾稔知伊等情形著即公會商具奏
命授包沁宰桑綽滿為四品總管

上諭軍機大臣曰據班第等奏稱上年收服包沁宰桑綽滿屬下九百餘戶時將伊兄阿克珠勒投為總管及大兵抵伊犁綽滿即前來投誠等語上年收服包沁人衆時綽滿未在游牧伊兄阿克珠勒率屬先降是以授為總管今綽滿又經歸降著授為四品總管協同伊兄管領部衆班第等可即傳諭阿克珠勒綽滿知之

命授故扎哈沁宰桑敦多克之弟鄂爾奇木濟為散

秩大臣仍襲伊兄宰桑管理游牧事

辛酉

命議給準噶爾台吉宰桑等俸祿

上諭軍機大臣曰準噶爾各台吉按其戶口封爵授職俟伊等入覲之日再降諭旨其給與俸祿應先為查辦再管理事務之宰桑等既有職分亦應給俸但道里遼遠若俱頒自內府未免繁費非久遠可行之道除王公扎薩克俸祿仍由內地頒發外

其給與宰桑等俸祿若於衆鄂拓克應交賦稅內
支給較為便捷著傳諭班第等將準部王公扎薩
克等照內地扎薩克一體給俸作何支領其宰桑
等俸祿如何酌量等級由交納賦稅內除養贍喇
嘛外可否足數支給之處詳悉查明定議具奏
命派定準部歸公管轄之二十一昂吉等旗分

上諭軍機大臣曰準噶爾四衛喇特台吉等俱照內
扎薩克一體分封汗貝勒貝子公扎薩克等爵秩

令各管轄所屬諸事俱應照內扎薩克一體辦理
此時尚無庸分派旗分其歸公管轄之宰桑等無
人統轄此項鄂拓克等應照察哈爾等擬定八旗
名目著班第等將歸公管轄之二十一昂吉仍存
其舊日名號分立八旗定議具奏